



Gwasanaeth Llysoedd
a Thribiwnlysoedd EF

Arweiniad i Wasanaeth Rheithgor



Cynnwys

Cyflwyniad	1
Swyddogaeth hanfodol rheithwyr	1
Cyn dechrau	2
Diwrnod cyntaf gwasanaeth rheithgor	3
Lwfansau	8
Trefn treial	9
Cefnogaeth	17
Cyflwyno Sylwadau	18

Cyflwyniad

Bob blwyddyn, mae tua 200,000 o bobl yn gwasanaeth ar reithgor, dyletswydd gyhoeddus hanfodol. Rydych wedi cael eich dewis wasanaethu ar reithgor oherwydd bod eich enw wedi'i ddewis ar hap o'r gofrestr etholiadol.

Mae'r llyfryn hwn yn esbonio beth gallwch chi ei ddisgwyl a bydd yn eich helpu i baratoi.

Nid oes angen unrhyw hyfforddiant cyfreithiol arnoch i wasanaethu ar reithgor. Bydd popeth yn cael ei esbonio i chi ac os oes rhywbeth nad ydych yn ei ddeall, gallwch basio nodyn i'r barnwr drwy dywysydd i ofyn am eglurhad.

Mae mwy o wybodaeth ar gael yma: www.gov.uk/jury-service.

Os oes gennych gwestiynau o hyd, gallwch gysylltu â'r Swyddfa Wysio Rheithgorau Ganolog ar 0300 456 1024 tan wythnos cyn i'ch gwasanaeth rheithgor ddechrau. Ar ôl yr amser hwnnw, dylech gysylltu â'r Llys lle mae gofyn i chi fod yn bresennol. Bydd y rhif ffôn i'w gweld ar y daflen Wybodaeth Leol a anfonwyd atoch gyda'r llyfryn hwn. Rhowch eich enw a'ch rhif rheithiwr (a geir ar frig y wŷs) os oes angen i chi gysylltu â'r biwro neu'r llys.

Swyddogaeth hanfodol rheithgorau

Y rheithgor sy'n penderfynu canlyniad treialon yn Llys y Goron. Maen nhw'n gwrando ar dreialon troseddol mwy difrifol fel lladrata, byrgleriaeth a throseddau cyffuriau. Mae'n bosib y bydd gofyn i reithgor wrando achosion fel llofruddiaeth hefyd a threisio, er bod y rhain yn llai cyffredin.

Mae gan bawb brofiadau a chefnidir unigryw ar reithgor. Bydd profiadau a gwybodaeth y rhai a wysiwyd yn wahanol, ond eto bydd gofyn i bob rheithwr ystyried y dystiolaeth a gyflwynir ac yna benderfynu a yw'r diffynnydd yn euog a'i yn unol â chyfarwyddyd y barnwr ar y gyfraith.

Pan fydd rheithgor yn cyrraedd dyfarniad, nid gwneud penderfyniad sy'n effeithio ar y diffynnydd unigol a wna, mae hefyd yn gwneud penderfyniad sy'n effeithio ar y gymuned.

Am y rheswm hwn mae gwasanaeth rheithgor yn cael ei ystyried yn un o'r dyletswyddau dinesig pwysicaf y gellir gofyn i unrhyw un eu cyflawni. Ychydig o benderfyniadau a wneir gan aelodau'r cyhoedd sy'n cael cymaint o effaith ar gymdeithas â dyfarniad rheithgor.

Rydym yn ddiolchgar iawn am eich cyfraniad.

Cyn dechrau

Os ydych wedi cael eich galw i wasanaethu ar reithgor ac os yw eich gwŷs wedi ei chadarnhau, mae'n ofyniad cyfreithiol arnoch i gymryd rhan yn y broses gyfiawnder troseddol fel rheithiwr.

Mae dynwared rheithiwr yn drosedd. Ni all rhywun arall gymryd eich lle. Dim ond i'r sawl a enwir ar wŷs y mae'r wŷs ac ni ellir ei throsglwyddo i neb arall.

Mae'n bwysig eich bod yn rhoi gwybod i'ch cyflogwr, gofalwr plant neu unrhyw un arall y gallai eich absenoldeb effeithio arnynt.

Os ydych wedi symud allan o'r ardal cyn i chi ddechrau eich gwasanaeth rheithgor, cysylltwch â'r Swyddfa Wysio Rheithgorau Ganolog cyn gynted ag y gallwch er mwyn iddynt eich trosglwyddo i llys sy'n lleol i'ch cyfeiriad newydd. I ddarparu manylion eich cyfeiriad

newydd, anfonwch e-bost at jurysummoning@justice.gov.uk. Os oes angen i chi siarad â rhywun am newid cyfeiriad, gallwch gysylltu â'r Swyddfa Wysio Rheithgorau Ganolog ar 0300 456 1024.

Cyn ac yn ystod eich gwasanaeth rheithgor, byddwn yn cadw mewn cysylltiad â chi drwy e-bost os oes gennym eich cyfeiriad e-bost. Edrychwch yn eich mewnlwch a'ch blwch sothach yn rheolaidd, yn enwedig yn yr wythnos cyn eich dyddiad cychwyn ac unwaith y byddwch chi'n dechrau.

Rheithwyr ag anableddau

Mae addasiadau rhesymol ar gael i gefnogi pobl sydd ag anableddau. Os oes angen gwybodaeth benodol arnoch am y gefnogaeth sydd ar gael yn ystod eich gwasanaeth rheithgor, neu os nad ydych eto wedi nodi unrhyw ofynion am addasiadau rhesymol yn eich cyfathrebiadau â ni, dylech gysylltu â rheolwr y rheithgor yn y llys lle rydych wedi cael eich galw. Bydd y rhif ffôn i'w gweld ar y daflen Wybodaeth Leol a anfonwyd atoch gyda'r llyfryn hwn.

Diwrnod cyntaf gwasanaeth rheithgor

Presenoldeb

Mae'n bwysig eich bod yn cyrraedd mewn pryd. Os ydych chi'n meddwl eich bod chi'n mynd i fod yn hwyr neu os ydych chi'n sâl ac yn methu mynd, rhaid i chi gysylltu â'r llys cyn 9.30am y diwrnod hwnnw.

Gallwch gael dirwy am beidio ag ymddangos i wasanaethu ar reithgor.

- Efallai y byddwch yn cyflawni trosedd sy'n dwyn cosb o ddirwy o hyd at £1,000 os:
- nad ydych yn dod i'r llys ar gyfer gwasanaeth rheithgor heb achos rhesymol
- nad ydych ar gael i fod yn rheithiwr heb achos rhesymol pan fydd eich enw'n cael ei alw
- pan fydd eich enw'n cael ei alw, nad ydych yn ffit i wasanaethu oherwydd diod neu gyffuriau

Teithio a pharcio

Lle bo'n bosib, dylech ddefnyddio trafnidiaeth gyhoeddus i gyrraedd y llys.

Mae'r daflen Wybodaeth Leol amgaeedig yn cynnwys gwybodaeth ynglŷn â theithio i'r llys.

Rheolau ynglŷn â gwisg

Does dim rheolau llym ynglŷn â gwisg a gallwch wisgo dillad rydych chi'n gyfforddus ynddyn nhw, fel jîns a chrys-t.

Ni ddylid gwisgo dillad anffurfiol iawn, fel dillad traeth neu unrhyw beth ar eich pen, oni bai ei fod am resymau crefyddol.

Beth sydd angen i chi ddod gyda chi

Pan fyddwch yn cyrraedd y llys gwnewch yn siŵr bod gennych eich gwŷs rheithgor a/neu eich llythyr cadarnhau neu e-bost, ynghyd â dull adnabod (ID) arall.

Mathau derbyniol o ddogfennau adnabod (ID):

- pasbort llawn
- trwydded yrru efo llun arni
- Cerdyn Adnabod Cenedlaethol un o wledydd yr UE; neu
- Dogfennau'r Swyddfa Gartref yn cadarnhau statws mewnfudo yn y DU.

Fel arall, gallwch ddarparu unrhyw ddau o'r canlynol:

- tystysgrif geni (a roddwyd o fewn chwe wythnos i'ch genedigaeth);
- Cerdyn credyd neu fanc gyda thri datganiad;
- tri bil cyfleustodau sy'n dangos eich enw a'ch cyfeiriad cyfredol.

Bydd staff y Llys yn gofyn i chi ddangos i'r rhain gadarnhau pwy ydych pan fyddwch chi'n cyrraedd y llys ar eich diwrnod cyntaf.

Diogelwch

Pan fyddwch yn cyrraedd y llys, bydd angen i chi fynd trwy'r drefn ddiogelwch. Rhaid i chi fynd trwy'r drefn ddiogelwch bob tro rydych chi'n mynd i mewn i adeilad y llys.

Efallai y bydd angen i chi giwio, felly gadewch ddigon o amser.

Dywedwch wrth y staff diogelwch eich bod yn rheithiwr, a byddwch yn cael gwybod lle i fynd.

Mae rheolau ar ba eitemau y gallwch fynd â nhw i mewn i'r llys.

Ni allwch ddod â gynnu, drylliau, cyllyll nac arfau eraill i mewn i'r adeilad. Byddwch yn cael eich riportio i'r heddlu os byddwch yn ceisio mynd ag arf i adeilad llys neu dribiwnlys.

Ni allwch chwaith fynd ag eitemau y mae staff diogelwch yn credu y gellid eu defnyddio fel arf, hyd yn oed os ydych chi'n meddwl eu bod yn ddiniwed.

Mae'r rhain yn cynnwys pethau fel:

- llafnau – fel siswrn, cyllell boced a rasal
- eitemau miniog eraill – fel nodwyddau, gweill a dartiau
- gwydr – er enghraifft poteli
- cyllyll a ffyrc metel
- chwistrell (oni bai bod gennych bresgripsiwn)
- gynnu tegan a phethau eraill sy'n edrych fel gynnu
- tŵls – er enghraifft sgrwddreifar, morthwyl a hoelion
- rhaffau a chadwyni
- alcohol
- hylifau nad ydynt yn ddiodydd neu feddyginiaeth bresgripsiwn - fel olew, persawr, petrol leitar a chynhyrchion glanhau
- ymbarelau hyd llawn
- helmedau

Amser aros

Unwaith y bydd pawb wedi cyrraedd byddwch yn cael gweld ffilm fer a fydd yn esbonio eich rôl a'ch cyfrifoldebau fel rheithiwr. Bydd hefyd yn egluro trefn y treial a rolau'r gwahanol bobl y byddwch yn eu gweld yn y llys. Os ydych chi am ei gwyllo ymlaen llaw gallwch ddod o hyd iddo ar www.gov.uk/jury-service

Ar ôl y ffilm, byddwch yn cael manylion y cyfleusterau lleol a'r gwahanol ffurflenni y bydd angen i chi eu llenwi, er enghraifft, er mwyn hawlio'ch treuliau, a byddwch yn cael cyfle i ofyn unrhyw gwestiynau sydd gennych.

Mae'n debygol y bydd amser pan fyddwch yn aros, felly rydym yn eich cynghori i ddod â gliniadur, llyfr, dyfais electronig, cylchgrawn neu bapur i helpu i basio'r amser. Gallwch ddod â ffonau/ tabledi i'r llys ond rhaid i chi beidio â defnyddio'r camera na recordio o fewn adeilad y llys.

Bydd y llys yn gwneud popeth o fewn ei allu i sicrhau nad ydych chi cael eich cadw i aros yn hir a bydd yn rhoi diweddariadau rheolaidd i chi.

Nid yw pob rheithiwr yn cael eu dewis i fod ar reithgor. Mae'n rhaid i ni alw mwy o reithwyr nag sydd angen er mwyn sicrhau bod digon ar gyfer unrhyw newidiadau munud olaf neu reithwyr nad ydynt ar gael. Byddwn yn eich rhyddhau cyn gynted ag y gallwn os nad ydym eich angen. Weithiau bydd gofyn i chi aros 'ar alw'. Mae hyn yn golygu y dylech chi barhau â'ch trefn ddyddiol arferol, gan gynnwys mynd i'r gwaith os gallwch chi. Os oes angen, byddwn yn cysylltu â chi, ar yr hwyraf y diwrnod cynt. Os gofynnir i chi fod 'ar alwad' ni fydd hyn yn newid eich cyfnod o wasanaeth rheithgor. Mae eich dyddiad cychwyn swyddogol yn aros yr un fath.

Cyfleusterau

Mae'r cyfleusterau'n amrywio o lys i lys. Gweler y daflen Wybodaeth Leol a anfonwyd atoch gyda'r llyfryn hwn am wybodaeth am yr hyn sydd ar gael yn y llys y'ch gwyswyd iddo. There are no child-minding facilities at court.

Nid oes cyfleusterau gwarchod plant yn y llys.

Beth allwch chi ei hawlio

Nid ydych yn cael tâl am wneud gwasanaeth rheithgor ond gallwch hawlio rhywfaint o arian yn ôl am golli enillion, gofal plant, teithio, a chostau bwyd a diod.

Cyfeiriwch at y daflen Lwfansau a anfonwyd gyda'r llyfryn hwn neu ewch i www.gov.uk/jury-service.

Gallwch hefyd ddefnyddio'r cyfrifiannell hwn i gyfrifo'r hyn y gallwch ei hawlio am wneud 10 diwrnod o wasanaeth rheithgor: www.gov.uk/check-juror-claims.

Os ydych chi'n hunan gyflogedig

Os ydych yn hunangyflogedig, rhaid cyflenwi tystiolaeth ddogfennol o golli enillion neu dreuliau ychwanegol yr aed iddynt e.e.

- prawf o fod wedi cofrestru yn hunangyflogedig;
- copi o ffurflen dreth flaenorol;
- llythyr gan gyfrifydd yn nodi incwm dyddiol cyfartalog ;
- llythyr wedi'i ddilysu gan rywun a fyddai wedi cynnig
- gwaith, gan ddyfynnu'r swm y byddai wedi ei dalu.

Gofynnwch yn y llys am ffurflen hawlio ar gyfer rheithwyr hunangyflogedig. Os ydych yn credu y byddwch yn wynebu colled, ond nad oes gennych dystiolaeth ddogfennol, mae angen i chi siarad â rheolwr y rheithgor yn syth gan efallai na bydd gennych hawl i unrhyw ad-daliad am golli enillion.

Polisiâu yswiriant

Mae yna wahanol bolisiâu yswiriant sydd weithiau'n cynnwys colledion tra bo rywun yn gwasanaethu ar reithgor. Gall hyn gynnwys polisiâu yswiriant teithio os yw gwyliau'n cael ei effeithio, a hefyd gall polisiâu busnes, cartref neu yswiriant personol gynnwys darpariaethau sy'n ymdrin â cholled a achosir gan wasanaeth rheithgor. Os oes angen unrhyw wybodaeth arnoch am eich gwasanaeth rheithgor gan y llys at ddibenion yswiriant, rhwchch wybod i'r swyddog rheithgor.

Trefn y treial

Amseroedd y llys

Fel arfer mae'r llys yn eistedd rhwng 10.30am a 4.30pm bob dydd. Fodd bynnag, yn dibynnu ar sut mae'r treial yn mynd yn ei flaen, gall y barnwr ofyn i chi eistedd oriau hirach neu fyrrach yn ddyddiol. Bydd eich gwŷs yn dweud wrthyhch pa amser i gyrraedd ar eich diwrnod cyntaf.

Dewis y rheithgor

Fyddwch chi ddim yn gwybod pa dreial y byddwch chi'n eistedd arno nes eich bod chi'n tyngu llw. Hyd yn oed pan fyddwch yn cael eich cymryd i ystafell lys, efallai na fyddwch yn cael eich dewis ar gyfer yr achos hwnnw.

Gall treialon bara ychydig ddyddiau neu nifer o wythnosau. Mae'r rhan fwyaf o achosion yn cymryd llai nag wythnos, felly efallai y cewch eich dewis ar gyfer mwy nag un treial neu eich rhyddhau rhag gorfod gwasanaethu.

Os yw treial yn debygol o bara'n hirach na'ch 10 diwrnod disgwylidig, gofynnir i chi a fydd hyn yn anodd i chi. Efallai y bydd gofyn i chi ddarparu prawf o'r anhawster, ond bydd y penderfyniad yn y pen draw a oes modd eich rhyddhau o achos hirach yn cael ei wneud gan farnwr y treial.

Ar ddechrau'r treial, bydd grŵp o reithwyr sy'n aros yn cael eu galw i'r llys. O blith y grŵp hwn, bydd y llys yn dewis y panel rheithgor ar hap drwy alw 12 enw i'r llys. Os byddwch yn cael eich dewis a'ch bod yn adnabod y diffynnydd neu unrhyw un arall sy'n rhan o'r treial, dywedwch wrth un o swyddogion y llys ar unwaith drwy basio nodyn iddo.

Os gelwir eich enw, rhaid i chi naill ai dyngu llw neu ddatgan cadarnhad. Mae'r ddau yr un mor bwysig, a bydd swyddog y llys yn gofyn pa ddull yr ydych am ei ddefnyddio a bydd yn eich gwahodd i ailadrodd ar ei ôl eiriau'r llw neu'r cadarnhad.

Ceir enghraifft o'r geiriad ar gyfer pob un isod:

- Y llw: Tyngaf gerbron yr Hollalluog Dduw y byddaf yn profi'r diffynnydd yn ffyddlon ac yn rhoi gwir ddyfarniad yn ôl y dystiolaeth.
- Y cadarnhad: Rwy'n dagan ac yn cadarnhau yn llwyr, yn ddiffuant ac yn wirioneddol y byddaf yn profi'r diffynnydd yn ffyddlon ac yn rhoi gwir ddyfarniad yn ôl y dystiolaeth.

Rhowch wybod i swyddog llys os oes angen llw gwahanol arnoch yn ôl eich crefydd. Dylai'r swyddog allu darparu'r llyfr sanctaidd priodol a llw neu bydd yn gofyn i chi ddod â'ch copi eich hun o'r ysgrythur sanctaidd. Gellir darllen y llw hefyd i chi ailadrodd os yw'n well gennych.

Ar ôl tyngu llw i reithgor, rhaid i chi eistedd yn yr un lle yn y blwch rheithgor bob amser.

Herio rheithiwr

Gallai erlynydd neu gyfreithwyr amddiffyn eich 'herio' os ydyn nhw'n credu na ddylech chi wasanaethu fel rheithiwr. Rhaid iddyn nhw roi rheswm da. Os yw'r barnwr yn derbyn eu rheswm, ni fyddwch yn cael gwasanaethu fel rheithiwr ar y treial hwnnw. Ond fe allech chi gael eich galw i wasanaethu ar y rheithgor mewn achos arall.

Yr achos

Mae pob treial troseddol yn dilyn patrwm tebyg. Bydd un neu ragor o ddiffynyddion wedi cael eu cyhuddo o drosedd gan yr erlyniad.

Bydd y treial yn dechrau gyda chlerc y llys yn darllen y cyhuddiadau yn erbyn y diffynnydd.

Byddwch yn clywed tystiolaeth gan yr erlyniad yn gyntaf, a fydd yn amlinellu manylion yr achos, gan alw a holi tystion. Pan fydd yr erlyniad wedi gorffen, bydd yr amddiffyniad yn dilyn trefn debyg.

Mae treial yn broses gyfreithiol gymhleth a weithiau bydd angen i'r barnwr a gweithwyr proffesiynol cyfreithiol drafod pwynt cyfreithiol.

Bydd y barnwr yn gofyn i'r rheithgor adael y llys am gyfnod byr. Os bydd hyn yn digwydd byddwch yn cael eich arwain allan o'r llys i ardal aros y tu allan. Ar ôl i'r mater gael ei ddatrys, bydd gofyn i'r rheithgor ddod yn ôl i'r llys.

Pan fydd yr holl dystiolaeth wedi ei rhoi, bydd yr erlyniad a'r amddiffyniad yn rhoi eu hareithiau clo. Byddan nhw'n siarad yn uniongyrchol â'r rheithgor wrth iddyn nhw ddadlau eu hachosion.

Yn olaf, bydd y barnwr yn crynhoi. Bydd y barnwr yn mynd dros ffeithiau'r achos ac yn dweud wrthyh chi, y rheithgor, am y gyfraith berthnasol. Bydd y barnwr hefyd yn rhoi cyngor i chi cyn i chi ymneilltuo i'r ystafell drafod i drafod yr achos ac ystyried y dyfarniad.

Ar ddiwedd y crynhoi, bydd y barnwr yn gofyn i'r rheithgor benodi pen-rheithiwr. Bydd y pen-rheithiwr yn gweithredu fel llefarydd y rheithgor ac yn cyhoeddi'r dyfarniad. Mae'r rheithgor yn penderfynu rhyngddyn nhw pwy ddylai fod yn ben-rheithiwr.

- Os oes angen eglurhad pellach arnoch ar unrhyw adeg, neu os ydych am ofyn cwestiwn, gallwch basio nodyn i'r barnwr drwy'r tywysydd.
- Os byddwch yn teimlo'n sâl, os byddwch angen defnyddio'r tŷ bach, neu os yw'r dystiolaeth yn peri gofid, peidiwch â bod ofn dweud wrth rywun -eto, pasio nodyn neu godi eich llaw i gael sylw'r tywysydd.
- Os oes gennych chi unrhyw bryderon am beth i'w wneud fel rheithiwr ar unrhyw adeg neu am ymddygiad cyd-reithiwr, siaradwch gyda'r tywysydd, swyddog rheithgor neu anfon nodyn at y barnwr.

Gwneud nodiadau

Byddwch yn cael beiro a phapur oherwydd efallai y bydd hi'n ddefnyddiol ichi wneud nodiadau. Bydd unrhyw nodiadau yn aros yn yr ystafell lys ac ni ellir mynd â hwy adref.

Gallwch fynd â'ch nodiadau i'r ystafell drafod unwaith y bydd y trafod yn dechrau.

Ar ddiwedd y treial bydd y nodiadau'n cael eu dinistrio'n ddiogel.

Trafod

Fe gewch wybod ymlaen llaw pan fydd yr achos yn cyrraedd y cam pan fydd y rheithgor yn mynd i mewn i'r ystafell drafod a phenderfynu ar yr achos.

Ar ddiwedd y treial, bydd y barnwr yn gwahodd y rheithgor i ymneilltuo i'r ystafell drafod.

Y tu mewn i'r ystafell drafod, mae rheithgor yn trafod yr achos drwy ystyried y dystiolaeth a gyflwynwyd yn y llys yn ofalus, dadl y ddwy ochr a chyfarwyddiadau'r barnwr. Gwaith y rheithgor yw penderfynu a yw'r diffynnydd yn euog neu'n ddieuog o'r cyhuddiadau a wnaed yn ei erbyn.

Unwaith y bydd y rheithgor yn trafod, ni chaniateir cyfathrebu â'r tu allan, ac eithrio trwy swyddogion y llys a neilltuwyd i'ch rheithgor y gellir cyfeirio atynt fel y Tywysydd neu Swyddog y Rheithgor. Felly, ni chaniateir i reithgor adael yr ystafell (heblaw am doriad i fynd i'r toiled) nes cyrraedd dyfarniad neu fod y Barnwr yn rhyddhau'r rheithgor am y dydd.

Byddwch yn cael gwybod sut i gysylltu â swyddog/swyddogion y llys a neilltuwyd i'ch rheithgor pe bai angen i chi wneud hynny.

Bydd y llys yn darparu dŵr, ond mae'n well dod â bwyd gyda chi i'r llys neu i ddefnyddio cyfleusterau ar y safle cyn i chi fynd i mewn i'r ystafell drafod i bennu'r achos (ac am y dyddiau ar ôl hynny, os yw'n cymryd mwy na diwrnod i'r rheithgor gyrraedd dyfarniad).

Byddwch yn cael mynd ag unrhyw nodiadau yr ydych wedi eu gwneud yn ogystal â chopi o'r ditiad (dyma'r ddogfen sy'n nodi'r cyhuddiad neu'r cyhuddiadau sy'n wynebu'r diffynnydd).

Mewn rhai achosion, efallai y byddwch hefyd yn cael mynd ag arddangosion a gyflwynwyd yn ystod y treial i'r ystafell drafod.

Os yw'r rheithgor yn dod ar draws unrhyw broblemau tra byddant yn trafod yr achos ymysg ei gilydd, gallant gysylltu â'r barnwr drwy swyddog y llys. Yna bydd y rheithgor yn mynd yn ôl i'r ystafell lys a bydd y barnwr yn cynnig cymaint o help â phosib. Sylwer na ellir rhoi tystiolaeth newydd yr adeg honno.

Os na cheir dyfarniad erbyn diwedd y dydd, bydd y rheithgor yn cael eu harwain yn ôl i'r ystafell lys a bydd y barnwr yn eu hatgoffa na ddylen nhw siarad â neb am yr achos. Yna byddan nhw'n cael eu rhyddhau'n ffurfiol tan y bore canlynol.

- Bydd y barnwr yn dweud wrthych **NAD YDYCH** i drafod y dystiolaeth gydag unrhyw un y tu allan i'ch rheithgor naill ai wyneb yn wyneb, dros y ffôn neu dros y we trwy wefannau rhwydweithio cymdeithasol.

- Os byddwch chi'n gwneud hyn, mae perygl i chi ddatgelu gwybodaeth sy'n gyfrinachol i'r rheithgor. Mae dyletswydd ar bob rheithiwr i gadw cyfrinachedd i'r rheithgorau eraill, i'r partïon ac i'r llys. Dim ond pan fo'r 12 rheithiwr yn ystafell drafod y rheithgor wedi gwrandao ar yr holl dystiolaeth yn y treial y gall rheithwyr drafod y dystiolaeth
- Mae'n drosedd sy'n dwyn cosb o ddirwy a/neu garchariad i reithwyr ddatgelu i unrhyw un unrhyw ddatganiadau penodol a wnaed, barn a fynegwyd, dadleuon datblygedig neu bleidleisiau a fwriwyd gan aelodau o'r rheithgor yn ystod eu trafodaethau.
- Mae 'na reolau llym eraill mae'n rhaid ichi eu dilyn. Byddwch yn cael copi o hysbysiad yn nodi eich cyfrifoldebau cyfreithiol fel rheithiwr pan fyddwch yn cael eich dewis i eistedd ar dreial a thyngu'r llw. Gallwch weld copi o'r hysbysiad yma: www.gov.uk/government/publications/notice-to-jurors.

Dirmyg llys

Eich lle chi ac aelodau eraill eich rheithgor yn unig yw ystyried y dystiolaeth a chyrraedd dyfarniad. Rhaid i chi drafod yr achos yn ystafell drafod y rheithgor yn unig pan fydd yr holl reithwyr yn bresennol.

Mae'n drosedd, sy'n dwyn cosb o ddirwy neu garchariad, i reithiwr ddweud wrth unrhyw un am unrhyw ddatganiadau, barn, dadleuon neu bleidleisiau a wnaed gan aelodau'r rheithgor tra'u bod nhw'n ystyried yr achos.

Drwy orchymyn y barnwr, ni ellir cymryd unrhyw ffonau symudol, gliniaduron, iPods nac unrhyw ddyfeisiau sydd â'r gallu i gysylltu â'r rhyngwrdd i mewn i'r ystafell drafod.

Gallai unrhyw reithiwr sydd â dyfais felly yn ei feddiant yn yr ystafell drafod fod yn euog o ddirmyg llys a gellir ei ddirwyo neu ei garcharu. Byddwch yn cael cynnig locer neu rywle diogel i storio'ch pethau gwerthfawr pan fyddwch yn mynd i mewn i'r ystafell drafod.

Dod i ddyfarniad

Byddwch yn cael digon o amser i drafod y dystiolaeth ymhlith eich gilydd a gwneud penderfyniad yr ydych i gyd yn cytuno arno.

Mewn rhai achosion, nid yw'r rheithwyr i gyd yn cytuno ar y dyfarniad. Yn y sefyllfaoedd hyn, gall y barnwr dderbyn penderfyniad y mae'r rhan fwyaf o aelodau'r rheithgor yn cytuno ag ef, ond nid pob un ohonoch. Gelwir hyn yn ddyfarniad mwyafrifol.

Pan fyddwch wedi dod i ddyfarniad, dywedwch wrth y tywysydd neu swyddog y rheithgor a byddwch yn cael eich tywys yn ôl i'r llys. Bydd clerc y llys yn gofyn i'r pen-rheithiwr am y dyfarniad ar bob cyhuddiad. Mae'n rhaid i'r pen-rheithiwr gymryd gofal i ateb y cwestiynau mae clerc y llys yn eu gofyn yn unig.

Pan fydd hyn wedi'i wneud, mae eich tasg ar ben, ond arhoswch ym mlwch y rheithgor nes i'r barnwr ddweud wrthyh am adael.

Cewch wybod os oes angen ichi fod yn bresennol eto neu os nad oes angen ichi aros.

Dedfrydu

Does gan y rheithgor ddim rôl yn y dedfrydu. Gall y barnwr ddedfrydu'n syth ar ddiwrnod y treial neu yn ddiweddarach. Os ydych chi eisiau gwybod canlyniad achos, gallwch gysylltu â'r llys ddiwrnod ar ôl y dyddiad dedfrydu.

Cefnogaeth

Mae'r rhan fwyaf o bobl yn gweld gwasanaeth rheithgor yn ddiddorol, yn rhoi ymdeimlad o fodlonrwydd ac yn rhoi boddhad ond i rai pobl gall fod yn brofiad anodd.

Cofiwch na fyddwch ar eich pen eich hun ac os oes gennych unrhyw anawsterau neu bryderon y gallwch siarad â staff y llys. Bydd rhywun wrth law i'ch cynorthwyo ar bob cam o'r broses.

Os ar unrhyw adeg yn ystod eich gwasanaeth rheithgor y bydd unrhyw un rydych chi'n credu y gallai fod yn gysylltiedig â'r achos yn cysylltu â chi, mae angen i chi gysylltu ar unwaith â staff y llys neu reolwr y rheithgor.

Os ydych yn teimlo dan fygythiad neu'n bryderus ar unrhyw adeg fel rheithiwr yna mae angen i chi gysylltu ar unwaith â staff y llys. Os nad ydych yn y llys a'ch bod yn meddwl eich bod mewn perygl uniongyrchol, dylech ffonio 999.

Mae rhagor o wybodaeth ar gael yn y llys.

Mae'n drosedd i unrhyw un geisio ymyrryd â rheithiwr neu fygwth rheithiwr mewn unrhyw achos gerbron Llys y Goron. Os bydd unrhyw un yn cysylltu â chi ynglŷn â'r achos, rhaid i chi ddweud wrth swyddog llys neu heddwas ar unwaith fel bod modd rhoi gwybod i'r mater i'r barnwr.

Cyflwyno Sylwadau

Rydym bob amser yn agored i awgrymiadau ynglŷn â sut y gallem wella'r gwasanaeth rydyn ni'n ei roi i reithwyr. Byddwn yn anfon arolwg i chi ei lenwi pan fyddwch yn gorffen, neu os yw'n well gennych gallwch ysgrifennu at y llys. Os ydych chi'n meddwl bod ein staff yn haeddu canmoliaeth neu gydnabyddiaeth arbennig, byddem wrth ein boddau'n clywed gennych.

Rydym hefyd eisiau gwybod pan fydd ein gwasanaeth yn brin o'r hyn rydych chi'n ei ddisgwyl. Bwriad hyn yw ein galluogi i unioni pethau, gwneud gwelliannau a dysgu ar sail y profiad.

Y ffordd gyflymaff o gael ymateb yw siarad gydag aelod o staff y llys tra byddwch yn yr adeilad. Nhw sydd yn y lle gorau i wrando ar eich sylwadau, datrys eich cwyn yn gyflym ac egluro unrhyw beth sy'n aneglur.

Fel arall, gallwch gysylltu â'r llys drwy e-bost, ffôn neu lythyr. Neu cyflwynwch gŵyn gan ddefnyddio ein ffurflen ar-lein.

Os hoffech gael rhagor o wybodaeth am sut i gwyno gweler yr wybodaeth a'r ffurflen ar-lein yma: <https://www.gov.uk/government/organisations/hm-courts-and-tribunals-service/about/complaints-procedure>

Os ydych yn anhapus ag ymddygiad barnwr

I gael gwybod sut i gwyno am farnwr os nad ydych chi'n hapus gyda'r ffordd mae'n ymddwyn tuag atoch ewch i www.complaints.judicialconduct.gov.uk. Nid yw'r Swyddfa Ymchwilio Ymddygiad Barnwrol yn derbyn cwynion am benderfyniad barnwr na'r ffordd y mae barnwr wedi rheoli achos. Cwynion am gamymddwyn personol gan y farnwriaeth yn unig y byddant yn eu hystyried.

